

28 MAY 2001

Venezuela-Tiba (Bergambar)

PRESIDEN VENEZUELA TIBA UNTUK LAWATAN DUA HARI

SEPANG, 28 Mei (Bernama) -- Presiden Venezuela, Hugo Chavez tiba di sini hari ini untuk memulakan lawatan rasmi dua hari ke Malaysia dengan tujuan meningkatkan perdagangan dan pelancongan antara kedua-dua negara.

Ini merupakan lawatan rasmi kedua ke Malaysia bagi Chavez. Beliau pertama kali melawat negara ini pada Oktober 1999.

Ketibaan Chavez di Lapangan Terbang Antarabangsa KL disambut oleh Menteri Pembangunan Usahawan Datuk Seri Mohamed Nazri Abdul Aziz yang juga bertindak selaku Menteri Luar serta duta Venezuela ke Malaysia, Noel Ochoa.

Menteri Luar Datuk Seri Syed Hamid Albar kini berada di Jakarta untuk menghadiri Sidang Kemuncak Kumpulan 15 Negara Membangun (G15) yang bermula Rabu ini.

Antara yang turut serta dalam delegasi presiden seramai 30 orang itu ialah Menteri Luar Venezuela Kol. Luis Alfonso Davila, Menteri Sains dan Teknologi Dr Carlos Genatios dan Menteri Perancangan dan Pembangunan Dr Jorge Giordani, ahli-ahli perniagaan dan pegawai-pegawai kanan kerajaan.

Esok, Chavez dijadual mengadakan perbincangan bersama Perdana Menteri Datuk Seri Dr Mahathir Mohamad di Jabatan Perdana Menteri di Putrajaya.

Menteri Perusahaan Utama Datuk Seri Dr Lim Keng Yaik juga dijangka mengadakan perbincangan bersama pemimpin Venezuela itu mengenai kerjasama antara kedua-dua negara dalam industri getah dan perladangan.

Chavez dijadual berlepas ke Jakarta esok untuk menghadiri sidang kemuncak G-15.

Semasa lawatan terakhir beliau ke Malaysia, kedua-dua negara menandatangani deklarasi bersama untuk mengkaji semula, mengemaskini dan memperbaharui semua perjanjian yang ditandatangani oleh Venezuela dan Malaysia dari semasa ke semasa.

Venezuela dan Malaysia juga bersetuju untuk mengkaji semula projek-projek bersama di masa depan dan sedang mengkaji cadangan berkaitan industri petrokimia.

Kedua-dua negara itu juga memutuskan untuk mengaktifkan semula suruhanjaya bersama mereka dalam usaha memperkukuhkan dan memperbaharui hubungan dua hala dan kerjasama.

Chavez telah menyatakan rasa tidak puas hatinya terhadap jumlah perdagangan yang kecil antara Malaysia dan Venezuela yang menurut beliau berjumlah AS\$30.6 juta pada 1998, iaitu penurunan 18.5 peratus berbanding AS\$37.6 juta pada 1997.

-- BERNAMA

SR ES PR